

## Ĝalibona edi buka wailabuna

### *Lainuwanega*

Ĝalibona edi buka dolidolina bi wailabuna ba Devida ena waiguyau mulinemo bi bai i tubutubuĝana i giuwatedi. Bi buka dolidolina ba bainewa Solomon tamana Devida gabuna i vaivaina i giuwata.

Solomon i peki mulinemo ba Israel lavedi a dailidi te dobu labu a tubuĝa. Bi yaloussa yawanina ai isana Diuda bi aibadabada ba ai isana Israel.

Sauginemo Diuda ĝalibonidi bi Israel ĝalibonidi, Maimaituwa a vivivile ba nuwauba i kenakena. Wali saugemo ba ĝaliĝalibona mote Maimaituwa a vivile bi a moito vitedi bi maimaituwa ĝesaudi a laulauduneyedi ba kauwa gebogebodi a tubutubuĝa. Bi sauginemo Israel lavedi Maimaituwa vivilena a kaisakona ba taugiuwatana i giugiukamaĝedi. Bi ĝaliĝalibona edi buka wailabunemo, taugiuwatana laukai otina ba Elisa. Tana kauwidi i voivoiyedina ba lava Maimaituwa ena sagumo. Bi tana lava i giuwedi te Maimaituwa sa laudune munaĝe.

Maimaituwa ena lava i kovoĝidi bi edi ĝaviya i wai aninedi te a pani a nawedi. Bi kauwina Israel lavedi lisidimo i gei tubuĝa kaka muliĝa Diuda lavedi. Bi Maimaituwa mote ena lava i waianinedi te maso a munaga edi dobu otinemo eete kwalabu 70 a kovi.

### **Lauvina**

Waibada labu Israel bi Diuda 1:1-17, 41

Taugiuwatana Elisa ena titikuna 1:1-17, 41

Diuda bi Islael ġalibonidi edi titikuna 8:16–17:4

Asaliya edi ġalibona Sameliya tauninina bi Islael lavedi edi waibadamo i kaikamaġedi bi i pani nawedi 17:5-40

Diuda ġalibonidi edi titikuna 18:1-21, 26

Ġalibona Esekaiya ena waibadamo i waitubu te i nawa ġalibona Dosaiya enai bada sauginemo i tava 18:1–21:26

Diuda edi ġaliġalibona kovikovididi edi titikuna 23:31–24:20

Babilon ġalibonana Yelusalem bi Diuda dobuna lavedi i pani nawedi 25:1-30.

## 2

### *BADA Elaidiya i nawe malamo*

<sup>1</sup> Sauginemo BADA maso yavala vilivilitoto Elaidiya i saġe i nawena malamo ba Elaidiya bi Elisa Gilgal a ġose bi a nawa. <sup>2</sup> Bi ġome Elaidiya, Elisa i giuwena gado, “Niga ġome kwa miyamiya, BADA i giukamaġegu te yà nawa Betel.”

Geġa te Elisa i giuwena gado, “BADA miyamiyana isanemo yà giugiu te mote yàma gosem.” Taunana aubaina labuidi a nawa Betel.

<sup>3</sup> Bi ġome taugiuwatana dubudi Betelmo a miyamiyana Elisa a giuwena gado, “Kuna sibe ee geġa te niganana Maimaituwa em bada ya nawe malamo?”

Bi Elisa i giuwedina gado, “Ei, e sibe bi koma giugiuwata.”

<sup>4</sup> Kamaina bi Elaidiya, Elisa i giuwena gado, “Elisa, niga ġome kwa miyamiya, BADA i giuwegu te yà nawa Deliko tauninemo.”

Bi geġa te Elisa i giuna gado, “BADA miyamiyana isanemo yà giugiu te mote yàma gosem.” Kamaina bi a nawa Deliko.

<sup>5</sup> Bi Deliko tauninemo taugiuwatana dubudi a miyamiyana a tava Elisa lisinemo bi ai talayena gado, “Kuna sibe ee geġa te niga laġanina ba Maimaituwa em bada ya nawe malamo?”

Bi Elisa i giuwedina gado, “Ei, e sibe bi koma giugiuwata.”

<sup>6</sup> Kamaina bi Elaidiya, Elisa i giuwena gado, “Elisa niga ġome kwa miyamiya bi BADA i giuwegu te yà nawa Diyoudan gaubinemo.” Bi Elisa i giuwena gado, “BADA miyamiyana isanemo yà giugiu te mote yàma gosem.”

Kamaina bi labuidi a nawanawa, <sup>7</sup> ba taugiuwatana dubudi nopodimo olooloto wapedi 50 muliġa a nawa. Bi Diyoudan gaubina diyanemo Elaidiya bi Elisa a vamoito bi taugiuwatana ba ġotona manekemo a vamoito bi tedi a wai kitawatedi. <sup>8</sup> Bi Elaidiya ena kwama i kaikamaġe, i vilinoku bi kwamanemo gauba i kwapu. Kamaina bi gauba i nuwadaili te doġa ġasaġasalinaġa labuidi a damana noi nevanemo.

<sup>9</sup> Sauginemo noi nevanemo a tava, Elaidiya, Elisa i giuwena gado, “Kwa giuwegu bai aubaim yà voiye, muliġa kaka BADA ya nawegu malamo?”

Bi Elisa i giuwena gado, “Aee, ġailisi wailautawina lisimmo kwa vitegu bi gabum yà vai te taugiuwatana edi bada.”\*

---

\* **2:9:** Israel lavedi edi vaivaimo gomana tautuwaġa gagasa wailautawina ya vai. Elisa mba taunana Elaidiya lisinemo ya waibaġaye te maso gabuna i vai.

<sup>10</sup> Bi Elaidiya i giuwena gado, “Kauwa dididiga kunai baĝaye. Bamoda kwa kitagu bi BADA ya vai naweguna, kaka bai kunai baĝaena kwa vai. Bamoda mote ima tubuĝa ba geĝa.”

<sup>11</sup> Tedi etaĝa ai giugiu bi a nawanawa te osi bi seliot mavavavanidi ai maĝemoti te Elaidiya bi Elisa i dailidi. Bi yavala vilivilitoto i yovo te Elaidiya i vilivai te i nawe malamo. <sup>12</sup> Elisa mainana i kitakita ba i binauna gado, “Aiyoi Tamagu! Tamagu! Israel edi seliot bi osi tauvelauyedi tagu e kitedi.” Bi Elaidiya mote i kita munaĝe. Kamaina te nuwaboya matailina ba ena kwama i lisi labu.

<sup>13</sup> Bi sauginemo BADA, Elaidiya i nawenawe ba ena kwama i kuluva doĝamo. Ĝome Elisa kwama i vai bi i munaĝa, Diyoudan gaubina diyanemo i moito. <sup>14</sup> Bi tana Elaidiya ena kwama i kuluva bi i vaivaina, kwamanemo gauba i kwapu bi i binauna gado, “BADA, bamo, Elaidiya ena Maimaituwa?” Sauginemo Elisa gauba i kwapukwapu ba i nuwadaili bi i damana munaĝa noi nevanemo.†

<sup>15</sup> Bi Delikomo ĝome taugiuwatana dubudi bi tedi ĝotona manekemo, a kita te bai i tubuĝa bi a giuna gado, “Elaidiya ena ĝailisi ba niganana i damana Elisa lisinemo!” Kamaina bi a nawa Elisa lisinemo bi matanemo a laudune yovo doĝamo, <sup>16</sup> bi a giuwena gado, “Tama ĝaiĝailisimai bi wapamai 50. Bi kwai aninimai te ka nawa em bada ka tavuĝe. BADA Aluwina male em bada i avali

---

† **2:14:** Niga kauwina ya kakamaĝati te Elisa ba Elaidiya epaiyanina tana Elaidiya ena ĝailisi bi ena waibada ya vai (Ĝaligalibona edi buka dolidolina ko kita 19:19).

nawe oya dabanemo e gwagwamo i sako.” Bi Elisa i giuwedina gado, “Geġa, koma nawa.” <sup>17</sup> Bi tedi a lauyaviyavi bi a voiye te i waidabauba taunana aubaina i waianinedina gado, “Kamaina ko nawa.” A nawa bi laġan faiona ai tavutavu bi mote a banavi. <sup>18</sup> Bi Elisa Delikomo i miyamiya bi sauginemo a tava munaġa ba i giuwedina gado, “E giuwemi te maso mote ko nawa.”

## 4

### *Elisa bi Sunem waivinina*

<sup>8</sup> Laġan ġemota Elisa i nawa Sunem tauninemo. Bi ġome waivini waiguyauna i miyamiya. Tana Elisa i giu vavasage te ya nato ena vanuwemo bi ya kani. Bi laġan muliġa maġa i nawana ba maso i nato lisinemo i kanikani. <sup>9</sup> Bi waivini mwanena i giuwena gado, “Bada, niga olotona tagu e sibe, laġan wapawapa niga maġa ya nawanawa tana Maimaituwa taugiuwatana laukaina. <sup>10</sup> Bi i visu te eda vanuwa dabanemo ena gabu ta voiye. Bi ena ani kena, ena bena, ena ani miya bi kwadam ta sivudi. Bi sauginemo i tavana ba ġome ya kenakena.”

<sup>11</sup> Bi laġan ġemota Elisa i tava Sunem tauninemo ba i saġa noke vanuwa dabanemo, ena ani kenamo bi i guliyovo i waiyawasi.

<sup>14</sup> Elisa ena taupaula Geġasi i waitalayena gado, “Bai visuvisuna niga waivinina aubaina ta voiye?” Bi Geġasi i giuna gado, “Tana mote i wainatuna bi mwanena kaikana i magula.”

15 Kamaina bi Elisa ena taupaula i giuwena gado, “Kwa yoge ya saḡe.” Bi Geḡasi waivini i yoge te i saḡa mataetamo i moito. 16 ✨Bi Elisa i giuna gado, “Niga mainana laḡannemo bokina kwalabunemo ba gomana olotona nimamo kwa bewabewa.”

Bi waivini i giuna gado, “Tam ba Bada taugiuwatana mote kuma kaiyovuḡegu bi tagu ba em taupaula.”

17 Kamaina bi waivini i bwaga bi mba laḡannemo mainana kwalabu ḡesaunemo i wainatuna, maibena Elisa i giugiuwena luvanemo.

### *Elisa lava 100 i wai kanidi*

42 Bi sauga ḡesaunemo oloto ḡemota Bal-Salisa tauninaḡa i tava. Bi mba kwalabunemo witi a geigei losina falawa wapedi 20 a voyedi bi kota witi baikina Elisa i vite. Bi Elisa ena taupaula i giuwena gado, “Lava kani kwa vitedi te sa kani.”

43 Bi ena taupaula i giuna gado, “Waye! Niga mote luvana te lava 100 sa kani.” Bi Elisa i giuna gado, “BADA i giu te lava sa kani bi mulinemo kani nevana ya kena gwasa, taunana aubaina kwa vitedi.”

44 Kamaina bi taupaula lava kani i vitedi. Bi lava a kani te a kani nonoḡa bi kani nevana i kena gwasa, BADA i giugiuna luvanemo.

## 5

### *Elisa, Naman i wai yawasani*

<sup>1</sup> Sailiya edi galibona ena tauwaiḡaviya edi bada dididigina isana Naman. BADA i sagu te kedi ḡaviya a lauyovoḡedi. Ḡome Sailiya galibonana i kita te, Naman ba lava laukaina bi lava a vivivile kauwe. Bi tana ba tauwaiḡaviya laukaina bi sida kapa i vai.

<sup>2</sup> Sailiya lavedi wala a nawa Israel lavedi a waiḡaviyedi te waivini guguginina ai dolivai te Naman mwanena ena taupaula. <sup>3</sup> Bi muliḡa taupaula guguginina ena bada waivinina i giuwena gado, “Bamoda Naman maso i nawa Sameliya bi taugiuwatana i kita bi ena sida kapa maso i waiyawasani.”

<sup>9</sup> Kamaina bi Naman ena seliotmo i gelu bi i nawa Sameliya bi Elisa ena vanuwa ganakukuna mataetinemo i vamoito. <sup>10</sup> Bi Elisa giu i giukamaḡena gado, “Kwa nawa bi Diyoudan gaubinemo mala 7 kwa asiwa. Bi tunim ya visuvisu bi kwa yawasana.”\*

<sup>11</sup> Bi geḡa te Naman ma medimedina i nawa bi i giuna gado, “Ei noḡotana bena ya yovo, ya moito bi aubaigu ya laupali ena Maimaituwa lisinemo bi nimana yai kwade tunigumo bi yai yawasanigu. <sup>12</sup> Damaskasmo gauba Abana bi Fafa mote a visu gulata, ee? Maso ḡome e asiwa bi e yawasana.” Taunana aubaina ma medimedina i nawa.

<sup>13</sup> Bi Naman ena taupaula i nawa lisinemo bi i giuwena gado, “Egu Bada bamoda taugiuwatana

---

\* **5:10:** Mousis ena waiḡake i giu te sida kapa lava bi i vaina ba ya kamilamila (Livai 13:3 ko kita).

i waibaḡam te noya dididiga kwa voiye ba maso kuna voiye. Taunana aubaina kwa nawa bi bai taugiuwatana i giuwemna kwa voiye te kwa asiwa bi kwa yawasana.” <sup>14</sup> Taunana aubaina Naman i nawa Diyoudan gaubinemo bi mala 7 i asiwa maibena Maimaituwa taugiuwatana i giugiuwena mainana. Kamaina bi Naman tunina i nuwa yaḡosi maibena gomana tunina bi i yawasana munaḡa.

<sup>15</sup> Ḡome te Naman bi ena taupaula a munaḡa Maimaituwa taugiuwatana lisinemo. Bi Naman i nato Elisa matanemo i moito bi kalinana dididiginemo i giuna gado, “Niganana kaka e sibe te bamo mote maimaituwa ḡesaudi dobumo geḡa te Islael edi Maimaituwa taunaḡa. Taunana aubaina, aee, niganana em taupaula lisigumo puyo kwa legaudi.”

<sup>16</sup> Bi geḡa te taugiuwatana i giuna gado, “Giukauwa, BADA ya miyamiya, tana taunana ena taupaula tagu bi isanemo yà giugiu te puyo mote yàma legaudi.” Avena te Naman, i giu vavasage te maso puyo i legaudi bi geḡa te Elisa i daboka.

<sup>17</sup> Kamaina bi Naman i giuwena gado, “Bamoda kwai aninegu te niga dobuna doḡana ḡotona yà ḡalavai bi egu donki labu sai geludi te yà nawe egu dobumo. Niganana bi noke i saḡa i nawana ba maimaituwa ḡesaudi lisidimo mote yàma laupuyo ee sewasewa yàma gabudi. Bi olta yà pati te Islael edi Maimaituwa taunaḡa lisinemo yà lausewasewa. <sup>18</sup> Bi yà noḡonoḡoti te BADA egu gebogebo ya noḡotikamaḡe sauginemo egu ḡalibona yai saguye bi ka nawa

Sailiya edi maimaituwa Limon<sup>†</sup> ani laudunena vanuwinemo bi laĝaninemo ka lauduneyena ba BADA maso egu gebogebo i noĝotikamaĝe.”

<sup>19</sup> Kamaina bi Elisa, Naman i giuwena gado, “Ma nuwaubam kwa nawa.” Ĝome te Naman i nawa.

*Israel edi ĝalibona Aĝab i peki. Tana mulinemo ba Israel lavedi edi ĝaliĝalibona ĝesaudi a moito saĝa. Bi tedi Sameliya tauninemo a miyamiya eete Osey a saĝa i waibada. Bi muliĝa te Asaliya lavedi edi tauwaiĝaviya Israel lavedi a lauyovoĝedi.*

## 17

*Israel lavedi gebogebo a voiye aubaina Asaliya a yovo a pani nawedi*

<sup>5</sup> Bi muliĝa Asaliya edi ĝalibona ena tauwaiĝaviya vaitedi a yovo Israel dobuna ai ĝaviye. Tedi Sameliya taunina ganakukuna mataetina a miya gudu bi a waiĝaviyena eete kwalabu faiona a kovi. <sup>6</sup> Bi Osey a Israel edi ĝalibona ena waibada kwalabu wai 9-nemo, Asaliya edi ĝalibona Sameliya taunina i lauyovoĝedi bi Israel lavedi a pani nawedi Asaliyamo. Ĝome kaka ĝesaudi a nawedi Ala tauninemo, ĝesaudi a nawedi Ĝabo gaubina diyanemo dobu isana Gosen bi ĝesaudi Mediya taunidiĝa a sivu nawedi.

<sup>7</sup> Asaliya lavedi a yovo bi Israel lavedi a pani nawedi banina edi Maimaituwa a laukasaiĝaiĝaiye bi maimaituwa ĝesaudi a laulauduneyedi bi gebogebo a voivoiyedi.

---

<sup>†</sup> 5:18: Limon ba Asaliya lavedi edi maimaituwa.

Maimaituwa taunana wala Idip ġalibonana ena waibadamo a miyamiya bi i kapotiyovodi. <sup>8</sup> Islael lavedi wali dobu lavedi edi vaivai bi edi koikoitau a laulauduneyedi. Mba dobudi lavedi taudidi dolinemo Keinan dobunemo a miyamiyana BADA i kwavivaidi. Bi Islael lavedi a laulauduneyedina banina edi ġaligalibona koikoitau a laulauduneyedi bi edi kauwa gebogebodi taudidi a kaikaiwatedi. <sup>9</sup> Bi Islael lavedi gebogeboda ġesaudi kandavonemo a voivoiyedi bi BADA edi Maimaituwa matanemo mote i visu. Bi edi tauniġa bi edi malagai keikeilikidiġa edi anilaudune gabudi a ġaledi. <sup>10</sup> Tedi oya dabediġa bi kai waguludiġa maimaituwa waivinina Asela aluwina ai moito nawedi.

### *Lava tabudi a tava Islael dobunemo a miya*

<sup>24</sup> Bi Asaliya ġalibonana, Babilon, Kuta, Ava, Amat bi Sepaviam taunidiġa lava i natomedi bi Sameliya noponemo taun matabudi nopodiġa i waidubu nawedi. <sup>25</sup> Bi tedi ġome a tava bi a miyana mote BADA a laulauduneye, taunana aubaina laiyon i giukamaġedi te ġesaudi ai pekidi. <sup>26</sup> Bi lava Asaliya ġalibonana a giuwena gado, “Lava kuna nawedi Sameliya tauninemo kuna sivudi bi sa miyamiyana, mba dobuna ena maimaituwa bi ena vaivai mote a sibe, taunana aubaina laiyon i giukamaġedi te sa waipekidi.”

<sup>27</sup> Asaliya edi ġalibona i giuna gado, “Pilisi ġemota ko giukamaġe ya munaġa Samelijamo. Bi ġome ya miya bi mba dobuna maimaituwana ena vaivai lava yai lovelovedi.” <sup>28</sup> Taunana

aubaina Pilisi ġemota wala a panipani natom-ena Sameliyamo a giukamaġe Betelmo bi lava ġome i wailovelovedi te bainewa Maimaituwa sa lauduneye.

<sup>29</sup> Bi lava mabai Sameliyamo a tavatavaitedina yaġolo te edi koikoitau a voivoiyedi. Bi Islael lavedi edi maimaituwa ġesaudi wala a voivoiyedina anilauduneyedi gabudimo a sivudi bi a laulauduneyedi.\*

## 18

### *Diuda edi ġalibona Esekaiya*

<sup>1</sup> Ela natuna Oseya Islael edi ġalibona bi ena waibada kwalabuna waifaionemo Eiġes natuna Esekaiya Diuda edi ġalibona, kota Diudiyamo waibada i vai. <sup>2</sup> Bi ena kwalabu 25 bi Yelusalem i waibadae eete kwalabu 29 a kovi. Bi tinana ba Abi, Sakalaiya natuna. <sup>3</sup> Bi tana ba ena kauwa a visu Maimaituwa matanemo maibena ena mag-ula Deivida. <sup>4</sup> ✧ Bi Esekaiya tana laudune kaikaiyovudi gabudi i dousuwesuwedi bi edi anivivila ġakimidi a wai moitodina i waidoukivikividi bi Asela aluwina kaidi a wai moitodina i oii kamakamaġedi. Bi Mousis wala bamo blonsimo mwata aluwina i voiyedi bi Islael lavedi a wai isana mwata

---

\* **17:29:** Niga gabudimo Islael lavedi maimaituwa kaikaiyovudi wala a laulauduneyedi. ✧ **18:4:** Nam 21:9

Neustan aluwina lisinemo piupiu a gabudi bi a laulausewasewa, vaitena i waidoukotokoto.\*

<sup>5</sup> Bi Esekaiya tana Islael edi Maimaituwa i waisumaġe bi i laulauduneye. Mba laġannemo mote bamo mai ġalibona ġesaudi Diuda noponemo, mote mai ġaliġalibona mulinemo e ġaliġalibona matanemo. <sup>6</sup> Tana BADA i waisumaġedidi bi kaiwatana mote i kaisako bi BADA ena waigake Mousis i vitevitena i kaiwata kauwe. <sup>7</sup> Tana BADA vaitena aubaina te noya i voivoiyedina ba didimanidi. Tana Asaliya edi ġalibona i waigaviye bi mote aubaina i noya. <sup>8</sup> Bi tana Filistiya lavedi i lauyovoġedi, malagai keikeilikidimo te taun nananakidimo bi i nawa te Gasa taunina palatina.

*Sauginemo ġalibona Esekaiya i peki bi natuna Manasa ena gabu i vai.*

## 21

### *Diuda edi ġalibona Manasa*

<sup>1</sup> Mba laġannemo Manasa ena kwalabu ba 12 bi i wai ġalibona bi Yelusalem i waibadaena ba kwalabu 55 a kovi. Bi tinana isana ba Ġebsiba. <sup>2</sup> Bi Manasa BADA i laukasagaiġaiye te lava mabai Keinan doġanemo a miyamiya bi BADA i kwa-vivaidi, muliġa kaka Islael lavedi a tava. Mba lavedi edi vaivai gebogebodi i kaikaiwatedi. <sup>3</sup> Bi

---

\* **18:4:** Wala nove kalakalalelemo a miyamiya bi sauginemo mwata i kalatidina mwatana aluwina a kita bi a yawawayasana. Bi niganana ba lisinemo sa laulau sewasewa maibena maimaituwa. Asela ba Keinan edi maimaituwa waivinina (Nambas 21:9 ko kita).

anilaudune gabudi tamana i kaka gebogebodina i ġala munagēdi bi kota olta i voyiyedi Bal anilauduneyena. Bi kai taditadina maimaituwa waivinina Asela aluwina i voyiye, maibena wala Islael edi ġalibona Aġab. Bi kota Manasa kipola i laulauduneyedi. <sup>4</sup> BADA i giuna gado, Yelusalem ba tagu anilauduneyegu bi geġa te tana, BADA ena vanuwa noponemo maimaituwa ġesaudi edi olta gabudi i voyiyedi. <sup>5</sup> Bi kota BADA ena vanuwa ganakukuna noponemo ani waiġemota gabunemo olta labu i ġaledi te kipola anilauduneyedi. <sup>6</sup> Manasa natuotina kaimo i lausewasewaye kota yabune bi ginauli kauwidi i voivoiyedi bi tauwaidoġadibu bi alualuwa waitedi a waiġiugiu bi kalinedi i kaikaiwatedi.\* Tana gebogebo nananaki otidi i voivoiyedi aubaina te BADA i medi gulata.

<sup>10</sup> Bi BADA, taugiuwatana lisidimo i giuna gado, <sup>11</sup> “Diuda edi ġalibona Manasa gebogebo nananaka otidi i voyiyedi mote mai Keinan lavedi. Bi lava i voyiyedi te ena koikoitau a lauduneye bi gebogebo a voivoiyedi. <sup>12</sup> Taunana aubaina BADA Islael edi Maimaituwa i giuna gado, kauwa wainuwa nainailidi Diuda bi Yelusalem lisidimo yà voyiyedi. Bi mba sauginemo mabai niga kauwidi wainuwa nainailidi sa vaiyedina ba sa naila. <sup>13</sup> Bi tagu Yelusalem lavedi yà kovoġidi, maibena Sameliya bi Islael ġalibonana Aġab ena tubulelesa waitedi e kovokovoġidina. Tagu mainana yà voyiye, maibena lava aboma ya koġa bi ya

---

\* **21:6:** Niga kauwidi a voyiyedi bi Mousis ena waiġake a laulau kasaġaiġaiye (Waiġake 18:14 ko kita).

waikabubutawana. <sup>14</sup> Bi egu lava miyamiya bagibagidi kauwa gebogebodi a voyiedi, taunana aubaina edi ḡaviya sa laukivigebogeyedi bi edi ḡonaḡona sa kwayavaidi.

<sup>15</sup> “Tagu mainana yà voyiena banina egu lava a voyiegu te e medi, nove edi magumagula Idipmo a potipotiyovona sauginemo bi i saḡa te niganana.”

<sup>16</sup> Manasa lava yabayababa i waipekidi bi Yelusalem taunina isuna te isuna kwasina i nawa yaḡosi. Bi kota Diuda lavedi nuwedi i wailausoludi te koikoitau a laulauduneyedi bi BADA matanemo gebogebo a voivoiye.

<sup>18</sup> Manasa i peki bi tamana ena animiyamo belana daibina isana Usa noponemo a dobo. Bi natuna Amon i saḡa te tamana ena gabu i vai.

### *Diuda edi ḡalibona Amon*

<sup>19</sup> Mba sauginemo Diuda edi ḡalibona Amon ena kwalabu 22 bi tamana gabuna i vai. Bi tana Yelusalem i waibadaena kwalabu labu. Bi tinana Alus tana ba Mesulamet natuna bi Yobat lavana. <sup>20</sup> Amon Maimaituwa i laukasāḡaiḡaiye maibena tamana Manasa. <sup>21</sup> Bi Amon tamana pesina i vai bi ena vaivai i kaiwata bi koikoitau i laulauduneyedi. <sup>22</sup> Tana tamatamana edi Maimaituwa ena waiḡake i miya tautauliyedi. <sup>23</sup> Bi ḡalibona Amon ena waibabada ḡesaudi ai ogatala bi ena vanuwa noponemo ai peki.

<sup>24</sup> Bi Diuda lavedi ḡesaudi a miya moito te ai ogatala bi Amon tauwaipekina ai pekidi bi natuna Dosaiya a sako saḡe te i waibada.

## 22

### *Diuda edi ĝalibona Dosaiya*

<sup>1</sup> Mba sauginemo Dosaiya ena kwalabu 8 bi tamana gabuna i vai te Diuda edi ĝalibona bi Yelusalem noponemo i waibadana ba kwalabu 31. Bi tinana ba Yedida bi Yedida tinana ba Adaiya tana ba Boskat lavana. <sup>2</sup> Dosaiya ena wai bada i visu Maimaituwa matanemo bi ena magula Deivida i voivoiyena mainana i voiye bi Maimaituwa ena waiĝake matabudi i kaikai-watedi.

*Dosaiya lava ĝesaudi i giuwedi te BADA ena vanuwa sa laivaliu. Bi laĝannemo a lailaivaliu ba Mousis ena waiĝake bukana a banavi bi a vai natome Dosaiya a vite.*

<sup>11</sup> Sauginemo waiĝake bukana a iyevi bi ĝalibona i vaivaiye ba nopona i kalati bi ena gala i lisi kamaĝe. <sup>12</sup> Bi Pilisi Gilkiya, Safet natuna Aĝikam, Mikaiya natuna Akbo, Safet ba ediya taugiluma bi Asiya ba ĝalibona taulaididimanina. Tana i giuna gado, <sup>13</sup> “Eda magumagula niga bukana bai i giugiuwena mote a kaiwata. Bi mote a giuweda te maso te kaiwata. Taunana aubaina Maimaituwa lisidemo i medi gulata. Ko nawa pali vanuwinemo te tagu bi Diuda lavedi matabuda aubaida Maimaituwa koi baĝa.”

*Bi Dosaiya ena tauwaibada ĝesaudi i giukamaĝedi BADA taugiuwatana ĝemota lisenemo. Bi taugiuwatana waivinina, niga giuna i giukamaĝe munaĝe ĝalibona lisenemo.*

16-17 “BADA niga mainana i giu, ‘Egu lava Diuda a dabokegu bi maimaituwa ĝesaudi lisidimo a laulausewasewa bi gebogebo ĝesaudi a voivoiyedi taunana aubaina lisidimo e medi gulata. E medina Yelusalem lisidimo mote aiyai kaka ima ka tautaugu, kamaina te ya tubuĝa.’ Niga mainana Maimaituwa i giu, ‘Tagu kaka Yelusalem lavedi matabudi yà kovoĝidi, maibena bukamo gilugilumimina ĝalibona i iyeiyevina mainana ya tubuĝa.’ <sup>18</sup> Bi ko munaĝa te Diuda edi ĝalibona ko giuwena gado, ‘Bada Israel edi Maimaituwa niga mainana i giu: Tam buka gilugilumina wadubonemo kuna vaiye. <sup>19</sup> E giuna gado, niga dobuna kaka yà kovoĝi te ya pupu. Tam Maimaituwa matanemo kuna sako yovoĝem bi maĝabam em gala kuna lisi kamaĝe te dobu bi lava aubaidi kuna laukuvasa aubaina em pali e vaiye. <sup>20</sup> Taunana aubaina kovoĝa e giugiuwipayena ma miyammo mote ima tubuĝa bi ma nuwaubam kwa peki.” Kamaina bi waivini ena giu a vai a munaĝena ĝalibona lisinemo.

## 23

### *Dosaiya Waianina i laivaliu*

<sup>1</sup> Kamaina bi ĝalibona, waibabada Yeluslemmo bi Diuda nopodimo i giuwedi a tava ai ĝemotidi. <sup>2</sup> Bi Diuda bi Yelusalem lavedi, pilipilisi, taugiuwatana bi lava matabudi nananakidi te keikeilikidi waitedi a saĝa a nawa BADA ena vanuwinemo. Kamaina bi waianina bukana gilugilumina BADA ena vanuwinemo a banabanavina, a wai beyavaiye bi i iyevi.

<sup>3</sup> Kamaina bi ĝalibona Pali vanuwina noponemo duĝumoito diyanemo i moito bi BADA matanemo i giuwapa te ena waianina i laivaliu te BADA ena giuvavasaga bi ena waiĝake bukamo ba ya kaiwatedi. Bi kota lava matabudi a giuwapa bi ai anina te BADA sa kaiwata. <sup>4</sup> ☆Kamaina bi ĝalibona Dosaiya bi Pilisi saĝasaĝa guletina Ĝilkaiya bi ena tausagu pilipilisi bi mataeta taulabena i giuwedi te palivanuwina noponemo Bal, maimaituwa waivinina Asela bi kipola ani lauduneyedi ĝoneĝonedi ai yovodi. Bi ĝalibona Yelusalem taunina mulinemo Kidlon gwagwanemo i wai kalaĝosedi bi pumedi i nawedi Betelmo.

*Kamaina bi Dosaiya, Diuda bi Israel dobudi i nawa yaĝosidi bi lava koikoitau a laulauduneyedina gabudi i kagebogebo bi koikoitau edi pilipilisi noyamo i waipotiyovodi.*

*Bi ĝaliĝalibona mabai Dosaiya a kaikaiwatana ba gebogebo a voiye bi mote Maimaituwa a vivile.*

**Buk Baibel long Kakabai**  
**Portions of the Holy Bible in the Kakabai language of**  
**Papua New Guinea**  
**Buk Baibel long tokples Kakabai long Niugini**

copyright © 2010-2016 Wycliffe Bible Translators, Inc.

Language: Kakabai

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-05

---

PDF generated using Haiola and XeLaTeX on 23 Aug 2023 from source files dated 9 Oct 2020

8614ef9e-7279-5fda-a20a-4c1b45b2f51a